

Muima Ndaem Reih

□ Mungz Ningz / 蒙宁

Seizdoeng gvaqbae lo, muima ninz baenz aen seizdoeng ndeu, daj ndaw congghaex bin okdaeu, iet hwet gikgyak, gag gangj gag danq naeuz: “Bineix gou ndaej guh di maz, caiq mbouj ndaej baenzneix maz cungj mbouj miz lo!”

Dingjlingz yiengzbya、douqhau caeuq duzlingz buet gvaqdaeu, gyoengqde dingq le gij vah muima, cungj angq dwk naeuz: “Daeggo muima, ndei lai lo! Muengh mwngz mbouj caiq lumj bi’gvaq yiengh-haenx.”

Baez dwen daengz bi’gvaq, muima caen mbouj ndei eiqsei. Bi-gvaq baez haicin, de couh angqvauvau caeuq gyoengq doengzdoh naeuz: “Bineix gou mbouj ndaej begbeg gvaq.” Hoeng, de cungj gaij mbouj ndaej mauzbingh gaeuq: Mbaet aen haeuxyangz ndeu, gab youq lajeiq, caiq mbaet aen he, couh gveng aen daih’it bae lo, mbaet aen daihsam seiz, youh gveng aen daihngaih bae, doeklaeng ndaw fwngz de cij lw di gijgwn ndeu. Di gijgwn yaep he couh deng de gwn sat lo. Muima gwq yienghneix guh ndigah maz doxgaiq hix rom mbouj ndaej.

Muima bekbek aek, miz bajbingq

dwk doiq yiengzbya、douqhau caeuq duzlingz gangj: “Sou cuengqsim, yawj gou bineix baenzlawz guh ba!”

Gyoengq doengzdoh raen muima yienghneix miz bajbingq, cungj angq dwk buet maranz, muengz bae ndaem reih.

Fwn seizcin “dida dida” doek roengz, muima muengh dwk gaiq reih namh ndaemndwtndwt baihnaj ranz, siengj youq gwnz gaiq reih neix, ndaem yiengh doxgaiq cei ndei gwn ndeu.

Hoeng, dauqdaej maz doxgaiq cei ndei gwn ne? Muima yungh fwngz mui bek aen gvaeu, yaep he siengj ndaem yiengh doxgaiq neix, yaep he youh siengj ndaem cungj doxgaiq haenx.

Ngoenz ndeu, muima raen yiengzbya vazmuengz daj baihnaj dou ranz buet gvaq, couh heuh de: “Yiengzbya daegnuengx, vaiq lwnh gou nyi, mwngz ndaem maz ha? Yiengzbya han naeuz: “Gou ndaem byaekbohcai. Byaekbohcai youh nomj youh oi, ndei gwn lai lo!”

Muima dingq yiengzbya baenz-neix gangj, ndawsim gig angq, gag gangj gag han naeuz: “Byaekbohcai youh nomj youh oi, gou vihmaz

mbouj ndaem ne?” Muima couh youq gaiq reih baihnaj dou de ndaem byaekbohcai.

Gvaq geij ngoenz le, gij byaek-bohcai muima ndaem haenx daj ndaw reih ndonj okdaeu lo, muima angq raixcaix. Hoeng, cingq youq seizneix de dingqgangj douqhau mbouj ndaem byaekbohcai, cij ndaem lauxbaeg. Muima roxnyinh geizheih lai: Byaek-bohcai youh nomj youh oi, douqhau vihmaz bae ndaem lauxbaeg ne?

Muima ra douqhau baez cam, douqhau han naeuz: “Gou gvaez gwn byaekbohcai, mboujgvaq, gou engq gvaez gwn lauxbaeg, lauxbaeg byoiq-setset……”

Muima naeuz: “O, laxlawz dwg yienghneix.” De doq byaij coh ranz bae doq siengj: “Lauxbaeg byoiqsetset, gou vihmaz mbouj ndaem lauxbaeg ne?” Muima ma daengz ranz le, couh loek gij byaekbohcai de ndaem bae caez lo, gaij ndaem lauxbaeg.

Caj lauxbaeg maj ok nyod, muima gig vuenheij. Hoeng, cingq-ngamj muima youh ndaejnyi duzlingz mbouj ndaem lauxbaeg, cij ndaem gvehoengz. De roxnyinh geizheih lai: Lauxbaeg byoiqsetset, hoeng duzlingz vihmaz bae ndaem gvehoengz ne?

Muima ra daengz duzlingz: “Gou hix gvaez gwn lauxbaeg, mboujgvaq, gou engq gvaez gwn gvehoengz, gwn gvehoengz ndaej gaij hozhawq caemh-caiq diemzsubsub……”

Muima fwd singj dwk gangj: “O, laxlawz dwg yienghneix.” De doq byaij coh ranz doq siengj: “Gwn gvehoengz ndaej gaij hozhawq caemhcai diemz-subsub, gou vihmaz mbouj ndaem gvehoengz ne?”

Muima ma daengz ranz le, couh loek nyod lauxbaeg okdaeu caez, ndaem hwnj gvehoengz.

Ndwenngoenz couh yienghneix gvaqbae lo, seizcou daengz lo. Bineix, yiengzbya、douqhau caeuq duzlingz cungj ndaej demsou. Dajsou sat, gyoengqde itheij daeu daengz baihnaj dou muima, baez yawj, cungj ngaez lo. Laxlawz, haemhlwenz roengz mwi, gij gvehoengz muima ndaem haenx lij caengz maj hung couh daicaep lo.

Muima cingq naengh youq gwnz haenzreih, au fwngz dak lajhangz, cingq ngaezngwd ne: “Gou baez ndonj ok congghaex couh muengz, daj seizcin muengz daengz seizcou, vihmaz maz cungj sou mbouj ndaej ne?”

Dwg ha, neix dauqdaej dwg vihmaz ne?

Mwngz Raen Mbouj Raen Gou

——sij hawj doenghgij hagseng mbouj maij doegsaw

□ Vangz Vazcingh / 黄华清

Mwngz raen roxnaeuz mbouj raen gou, gou couh ndwn youq gizhaenx, mwngz cix ngaemgyaeu doeng loengh sae loengh, gou baez doek baez cimyawj mwngz, mbat dem mbat byaij gaenh daezsingj mwngz, mwngz cix mbouj doengh mbouj danh. Mwngz baenzlawz ndaej cangguh yawj mbouj raen, baenzlawz ndaej yienghneix simgeng mbouj dam gou ne?

Mwngz niemh roxnaeuz mbouj niemh gou, liengh gou ciengzseiz youq gizneix, mbouj deuz mbouj bienq, mboujguenj mwngz rox mbouj rox saw, gij cingz gou doiq mwngz mbouj bienq, gij gvaez gou mbouj bienq, gou cij maqmuengh mwngz yied daeu yied cinbu, simhai vaiqvued.

Mwngz gvaez roxnaeuz mbouj gvaez gou, gou ciengxlwenx gvaez mwngz mbouj bienq, mbouj lai mbouj noix, gaxgonq yienghlawz, seizneix lij yienghlawz, gvaez mwngz mbouj bienq. Naeuz gou mbouj gvaez mwngz, mwngz hwnj dangz ninzcaem, gou vihmaz heuh mwngz; naeuz gou mbouj ndiep mwngz, mwngz fwngz sieng gvaeu in, gou vihmaz daiq mwngz bae yawj canghyw. Mwngz guh saehloek, gou naihsim son mwngz, mwngz rox loek gaijgvaq, gou daengx ban haenh. Gou itcig yawjnaek mwngz, mwngz cix vihmaz

yienghneix vutsoeng bonjfaenh?

Mwngz riengz roxnaeuz mbouj riengz gou, fajfwngz gou cix ciengzseiz mbehai, mbouj gvae mbouj gyawj. Mwngz riengz gou, gou son mwngz. Danghnaeuz mwngz mbouj vut gonq, gou hix mbouj gveng mwngz. Mboujguenj seizgan baenzlawz lae bae, gou lijdwg ndwn youq dieggonq caj mwngz, caj mwngz ngeix doeng. Mwngz mbouj rox doeg, gou couh son mwngz doeg, baez it baez ngeih, cijaeu mwngz gvaezhag; mwngz mbouj rox sij, gou gaem fwngz mwngz sij, song baez sam baez, mbouj dwk maz rengz. Gou cungj mbouj rox, mwngz mbouj suenq huk, cix vihmaz ngoenz gvaq ngoenz mbouj haengj hag?

Mwngz gvaez mbouj gvaez gou, niemh mbouj niemh gou, gou dwg lauxsae mwngz mbouj bienq, mwngz dwg hagseng gou mbouj gaij, gou ciengzseiz mbehai song fwngz caj mwngz, caj mwngz ngeix doeng le gaenx hag, son mwngz rox saw gvaug mwngz roxsoq, caj mwngz miz ngoenz he doiq gou gangj: Lauxsae, gou yaek rox saw, cingj mwngz son gou doegsaw son gou guh cozyez, son gou…… Gou itcig deq mwngz moengh singj, gou itcig gvaez mwngz caengz bienq gvaq.



Najdah gvangqlangh bya hungmbwk.

Dozsw

Aenvih Miz Mwngz

□ Vangz Civeij / 黄志伟

Aenvih miz mwngz
Seizgan lae bae cungj ngeix rag dauq laeng
Gou mbouj caiq doeknaiq
Ndawsim fatmwt youh caiqyienh nditndat
Aenvih miz mwngz
Souj sei gou maj baenz gaiq fwd
Youq mbanj gungx mbanj gvae
Mbin bae daengz Baeking
Aenvih miz mwngz
Gou itdingh roengzrengz buekmingh
Dawz sojmiz hohfuk
Vih mwngz
Hwnzngoenz eu fwen mbouj dingz